



Ignazio Cassis
durant in'intervista a Cuira.

FOTO TH. GSTÖHL

La Svizra basegna l'«italianità»

Ignazio Cassis sa preschenta

DA GUIU SOBIELA-CAANITZ

■ **Il 20 da settember elegia l'Assamblea federala la persunalitad da la plr che duai remplazzar cuss. fed. Didier Burkhalter. Trais fin ussa candideschans; ins n'astga betg excluder ina surpraisa da l'ultim mument, ma il pli probabel para ch'ins elegia cuss. naz. Ignazio Cassis.** Lez punctuescha ch'el na pretendia betg l'auta funcziun sco Tessinais, mabain sco representant da la «Svizzera Italiana», absenta en il cussegl federal (CF) dapi 1998. «Le Courrier» (Genevra) e «La Liberté» (Friburg) dals 24 d'avust han intervistà Cassis. I suonda ina resumaziun da sias decleraziuns.

Betg precipitar

Co è Cassis sco medi vegnì politicher? El fa endament: «L'epidemia d'Aids da lezza giada m'ha stimulà da ma spezialisar en medischina sociala e preventiva. Lura

sun jau vegnì medi chantunal, pia engaschà en medischina e politica enina; quai m'ha manà en il plr e suenter en il cussegl nazional.» Cassis rapporta ch'el haja presidià l'organisaziun «Curafutura», la quala haja «sustegnì l'intervenziun dal CF (...) per sminuir il squitsch da las premias sin ils segirads.» Pertge giavischa Cassis da far part sez da lezza autoritad? El respunda: «Nossa costituziun [federala] stipulescha l'equiliber da las linguas en il CF; dapi deschedotg onns è la cultura taliana dentant absenta da la regenza (...). La Svizra basegna l'italianità per esser la Svizra.» Cassis sa lascha inspirar da president John Fitzgerald Kennedy (1917–1963): «Jau giavisch ina Svizra nua che burgais e burgais sa dumondan tge ch'i possian far per il stadi, plitost che sa dumandar tge ch'il stadi possa far per els.» Davart la politica europeica declera Cassis: «Jau vi cuntinuar sin la via bilaterala e reglar nossas relaziuns cun l'Uniun europeica (UE) a moda stabla (...). Nus

n'astgain dentant betg precipitar, ma plitost observar il svilup da l'UE.»

Defender talian e rumantsch

Deputà Manuel Atanes (San Vittore), parsura da la deputaziun dal Grischun talian en il cussegl grond retic, ha benevolutà la candidatura da Cassis per il cussegl federal cun quests plets: «L'onn passà avain nus stuì lavurar per cuntanscher l'elecziun d'in derschader italofoon al Tribunal chantunal suenter in'absenza da passa trenta onns. L'onn che vegn stuain nus cumbatter l'iniziativa che vul abolir l'instrucziun da talian e quella da rumantsch, pia dals dus linguatgs minoritaris chantunals, en las scolas primaras dal Grischun germanofon (...). Jau crai d'exprimer l'opiniun cuminaivla cun dir che cuss. naz. Ignazio Cassis è era noss candidat. Nus duain tschertgar activamain il sustegn da noss cusrins rumantschs e da tgi che prendia a cor nossa plurilinguitad svizra. Unids essan nus pli ferm.»